

四庫全書

子部

欽定四庫全書

子部

山堂肆考卷一百七十二

詳校官中書臣閔思毅

主事臣祁韻士覆勘

總校官降調編修臣倉聖脉

校對官中書臣葉蘭

謄錄監生臣劉達

欽定四庫全書

山堂肆考卷一百七十一

明

彭大翼

撰

官室

第宅

釋名宅擇也言擇吉處而營之也其名起於堯舜之時蒲坂城外有舜宅是也尉繚子曰天子宅千畝諸侯宅百畝大夫以下里舍九畝宅亦曰第言有甲乙之次第也一說出不由里門面大道者名曰第爵雖

列侯食邑不滿萬戶不得作第其舍在里中者皆不稱

董仲舒宅

在江都縣大東門外仲舒嘗為江都易王相

趙充國宅

在鞏昌府清水縣北二里東漢建安中建為寺

孟嘗君宅

在青州府城西北隅修身坊宋為龍興寺夏竦記曰此

田文故第也今為城隍廟

酈道元宅

道元後魏人故居在涿州樓桑村南三里

土木勝人

說苑智襄子為室美士茁夕焉智伯曰室美矣夫對曰  
美則美矣臣意亦有懼也高山峻原不生草木土木勝  
人臣懼人不安室也室成三年而智氏亡又南部新書  
唐安史之亂法度隳絕中官戎帥競治亭館第宅力窮

乃止時號木妖

蓬蒿没人

見隱士

請宅自固

見將帥上

買宅自汚

漢高帝數使使問蕭相國何為有客說何曰胡不多買田宅賤貴貸以自汚上心必安何從其計

必居窮僻

漢蕭何買田宅必居窮僻不治垣舍曰令後世賢師吾  
儉不賢毋為勢家所奪

敢辭囂塵

白居易卜居履道里詩遊宦京都二十春貧中無處可  
安貧長羨蝸牛猶有舍不如碩鼠解藏身且求容立錐  
頭地免似漂流木偶人但道吾廬心便足敢辭湫隘與  
囂塵又云莫嫌地窄林亭小莫厭家貧活計微大有高

門空鎖宅主人到老不曾歸

宅近青溪

金陵故事南朝鼎族多在青溪而江總宅尤占勝地至宋時段約居之王安石詩往時江令宅近在青溪曲又云昔時江令宅今日段侯家

宅近青山

齊宣城太守謝朓築室青山之南人呼為謝公宅青山在太平府城東南李白題杜甫東溪幽居詩宅近青山



同謝朓

揚季一區

海錄揚氏之先揚季處岷山之陽有田一廛有宅一區  
世以農桑為業自季至雄五世而傳一子左思詠史詩  
寂寞揚子宅門無鄉相輿寥寥空宇內所講在玄虛言  
論準宣尼辭賦擬相如悠悠百世後英名擅八區

文靖五畝

晉桓玄欲以謝安宅為營其孫謝混曰名伯之仁猶惠

及甘棠文靖之德更不保五畝之宅耶玄慙而止按混  
字叔源風流為江左第一安宅在烏衣巷口

姜維宅

在鞏昌府鐵堂峽前人詩亂山深處一茅廬元是姜公  
舊隱居惟有鐵堂空峽在六韜留與子孫無

張華宅

在順天府盧溝河北岸

居宗玉宅

梁庾信字子山肩吾之子居宋玉故宅信哀江南賦所謂誅茅宋玉宅是也

### 居王椿宅

後魏王椿於鄉造宅廳事極高壯本郡人嘗呼椿為王太原一日時人忽云此乃太原王宅豈王太原宅未幾爾朱榮果居椿宅封太原王

### 請地益宅

漢武安侯田蚡景帝王皇后母弟也武帝即位蚡以肺

腑為相當請考工地益宅上怒曰君何不遂取武庫

取管為宅

唐長寧公主下嫁楊謹交造第東都使楊務廉管總第  
成府財幾竭又取西京高士廉左金吾衛故管合為宅  
右矚都城左廂大道作三重樓以憑觀帝及后數臨幸  
置酒賦詩

屋如傳舍

漢恩平侯許伯入第蓋寬饒賀之酒酣仰屋而嘆曰美

哉富貴無常忽則易人此如傳舍所閱多矣惟謹懼為能久

宅如逆旅

梁徐勉戒子書吾清明門第宅西邊既施宣德寺不復方幅意謂亦逆旅舍爾何事須華常怪時人謂是我宅古往今來豪貴繼踵宛其死矣定是誰室

特賜近第

史記漢高后德汝陰侯夏侯嬰脫孝惠魯元下邑之間

也乃賜以縣北第第一曰近我以尊異之注云北第第一者言近北闕之地嬰取第一也

改築新宅

蘇子由因舊詩序予因卞氏故居改築新宅其廳事陋甚有柴氏廳三間求售三百餘萬錢力不能致子遲曰因卞之舊而易其尤亦可子孫若賢當師公儉予愧其言從之作因舊詩

假大宅

史記田生如長安假大宅令其子求事左右謁者張釋卿

容長戟

晉王濬恢廓有大志嘗起宅開門前路廣數十步或問之濬曰吾欲容長戟旛旗衆咸笑之濬曰陳勝有言燕雀安知鴻鵠之志後夢三刀遷益州刺史

假宅種竹

世說曰晉王子猷每假人宅必種竹人詰之曰不可一

日無此君

買宅愛樹

唐王義方初拜御史置一第愛庭中青桐樹復召主人曰此佳樹得無欠償乎又與之錢四千

舍友

見友

遜兄

晉裴楷營新宅甚麗將移住從兄衍心欲之而不言楷



知其意便與兄住又劉宗蔡興宗父廓起二宅興宗以東宅與兄軌軌送錢五十萬裨宅直興宗白母母曰我家由来豐儉必共今日宅直不宜受也

天子榻門

唐田游巖隱箕山高宗拜為弘文館學士乘傳赴都帝營奉天宮游巖舊宅在宮左詔不聽毀天子自榻其門曰隱士田游巖宅按游巖宅在河南府登封縣南箕山之閒

有司給直

唐馬周為御史遣人圖購住宅衆以其起書生素無貲皆竊笑之他日所遣之人白有住宅直二百萬周以聞詔有司給直并賜奴婢什物衆乃悟又段文昌負才傲俗落拓荆楚間江陵街側有大宅門枕流渠文昌醉於渠上脫履濯足自言我作江陵節度使必買此宅聞者皆笑其後果鎮荆南遂買此宅

毀馬璘第

唐馬璘家富不貲治第京師侈甚其寢堂無慮費錢二十萬緡及璘卒喪歸都人爭入其第觀之假稱故吏赴弔者日數百德宗在東宮聞之不喜及即位乃禁第舍不得踰制詔毀璘中寢及官人劉忠翼第璘家懼悉籍亭館入之官其後上賜羣臣宴多在璘山池

### 假王涯第

唐王涯再為翰林學士帝以其孤進能自樹立數訪逮之以涯私居遠或召不時至乃假光化里官第諸學士

莫敢望

贖魏徵故第

唐李師道上私錢六百萬為魏徵孫贖故第白居易言  
徵任宰相太宗用殿材成其正寢後嗣不能守陛下猶  
宜以賢者子孫贖而賜之師道人臣不宜掠美帝從之  
贖呂端舊第

綱目宋呂端諸子多不同處舊第以質於人真宗聞之  
出內庫錢贖還之令其聚居端長子蕃言負人息錢甚

多帝別賜內庫金帛償之蕃弟荀與西京差遣仍令內侍省置簿為掌餽課給其家詔樞密院察其妄費

### 董賢宅

漢哀帝建董賢宅衣以綈錦

### 張遼宅

魏張遼字文遠為晉陽侯屢有戰功文帝曰此古之名虎也特為起舍第一區

### 廉泉讓水

見泉

嘉石美木

唐牛僧孺字思黯僕射竒章弘之裔治第於洛之歸仁里多致嘉石美木與賓客相娛樂

題帖賣宅

齊庾杲之接魏使使問齊國百姓那得家家題門帖賣宅荅曰朝廷欲掃蕩京洛克復神州所以家家賣宅耳

標榜賣宅

北齊皇甫亮所居宇洿下標榜賣之買者問其故亮曰  
為宅中水洿不洩雨即水流牀下由此宅終不售亮淳  
實不矯飾如此

東都別墅

見中書令

南山敞廬

唐孟浩然歲暮歸南山詩北闕休上書南山歸敞廬不  
才明主棄多病故人疎白髮催年老青陽逼歲除永懷

愁不寐松月夜窗虛

約板甃石

唐李林甫為相自知結怨者多憂刺客竊發所居重關  
複壁約板甃石一夕再徙家人亦莫之知也

疏沼構樓

唐白居易被上知遇為當時所忌乃放意詩酒無立功  
名意於東都所居履道里疏沼種樹構石樓與僧如滿  
結香山社鑿龍門八節灘為遊賞之所



宅無正寢

唐李義琰為相宅無正寢弟義璣為市堂材送之義琰曰以吾為國相且自愧尚營美宇是速吾禍豈愛我者耶木久材腐乃棄之

室無步廡

唐崔郾室處卑陋無步廡至霖淖則客穿屐以就外位

第開康衢

鄒奭傳齊宣王自淳于髡以下皆命為列大夫為開第

康莊之衢高門大屋以尊寵之

宅通永巷

唐郭子儀宅居親仁里四分之一中通永巷家人三千相出入不知其居又李訓起第善和里通永巷聚京師輕薄子

不容妻子

晉吳隱之為廣州刺史數畝小宅籬垣側陋内外茅屋六間不容妻子

不蔽風雨

見貧士

立宅東田

梁沈約立宅東田矚望郊阜為郊居賦以紀其事

結廬北渚

孔帖唐仲長字子光隱者也無妻子結廬北渚凡三十年非其力不食王績愛其真率徙與相近

治第叢煩

唐楊憑治第永寧里功役叢煩

治第華僭

唐許敬宗營第舍華僭至造連樓使諸妓走馬其上

羅含茅舍

見官廨

焦先草廬

見隱士

竹徑

杜詩卜築應同蔣詡徑為園須似邵平瓜

花溪

杜甫在成都劔南節度使裴冕為卜郭西浣花溪作草堂居焉或云嚴武為卜一云杜甫宅華昌府成縣飛龍峽之東唐天寶中避難於此

何文燒杵

搜神記魏郡張氏大富忽衰落財散賣宅於陳應舉家疾病又賣與何文文獨持大刀暮入北堂梁上一更中

有一人長丈餘高冠赤幘呼曰細腰細腰應諾問何以有人氣荅無便去文因呼細腰問向赤衣冠為誰荅曰金也在西壁下問君是誰荅曰我杵也今在竈下文掘得金三百斤燒去杵由此大富宅遂清寧

顯業得金

蘇秦宅在洛陽舊仁和里後魏尚書高顯業居此夜見赤光掘之得金百斤有銘曰蘇家金

張融舟居

齊張融為中書郎請假東出武帝問往何處荅曰臣陸處無屋舟居無水後問融從兄緒緒曰融近東出未有居止權作小船岸上住帝大笑

呂保崖居

夔州府梁山縣絕巖半腹有一穴人跡所不到漢赤眉之亂邑人呂保藏家貲巨萬賣金寶緣木而上鑿崖以居盡伐去其木寇不能近舉家得免於難

宅在秦淮

晉陸機宅在金陵秦淮之側有機兄弟讀書臺舊址一  
云在松江府城南門外宋梅堯臣有詩

宅在鍾山

王荊公宅在金陵鍾山所居四無居人其宅僅蔽風雨  
又不設垣牆望之若逆旅之舍元豐末被疾奏捨為寺  
有旨賜名報寧疾愈稅城中屋以居竟不造宅

當出貴甥

見舅甥



恐虧故主

聖宗擬遺徐鉉初自南唐入京市宅以居歲餘見故主  
貧甚鉉憐而召之曰得非售宅虧價而致是也余近撰  
碑獲潤筆二百千可償爾矣其主堅辭不獲亟命左右  
輦以付之

洛城破屋

韓文公寄盧仝詩玉川先生洛城裏破屋數間而已矣

武夷精舍

武夷精舍在建寧武夷山朱熹築室其下

私作都門

晉賀循為元帝丞相軍諮祭酒時廷尉張闓在小市欲奪左右宅以廣其居乃私作都門早閉晏開人訟於州府不見省會丞相賀循出連名詣循質之循曰見張廷尉當為言之闓聞之毀都門詣循致謝

不徙官廨

見官廨

賜第永崇

唐德宗賜李晟永崇里第及涇陽上田延平門之園林  
女樂八人蓋酬其收復長安之功也

賜第吳門

宋魏華父字了翁號鶴山蜀人也時蜀中兵亂不得歸  
上因賜第於吳門了翁歿吳人以為鶴山書院肖其像  
而祠之

為戴公起宅

晉郝超每聞欲高尚隱退者輒為辦百萬資并為造立  
居室在剡為戴公起宅甚精戴始往居與所親書曰近  
至剡如入官舍按戴公戴安道達也

為康節買宅

宋嘉祐七年王宣徽拱辰尹洛就天宮寺西天津橋南  
五代節度使安審琦宅故基以郭崇韜廢宅餘材為屋  
三十間請邵康節遷居之富鄭公又命其客孟約為買  
對宅一園有水竹花木之勝及熙寧初行賣官田之法

康節天津之居亦係官地榜三月人不忍買諸公曰使先生之宅他人居之吾輩蒙恥矣于是司馬公而下集錢買之

治第衢州

趙清獻先在杭州府舊治有高齋後治第衢州臨大溪其傍不遠數百步亦有山麓屹然而起即作別館其上亦名高齋謝政後唯居此館

卜居陽羨

宋蘇東坡自儋歸卜居陽羨時士人邵民瞻從公遊為公買一宅為緡五百公傾囊僅能償之卜吉將入居夜與邵步月至村落聞哭聲甚哀公徙倚聽之與邵推扉而入則一老嫗公問嫗何哀傷至此嫗言吾有一居相傳百年吾子不肖舉以售人今日遷徙百年舊居一旦訣別所以泣也坡亦愴然問故居所在則公以五百緡所得者因再三慰撫謂曰嫗之故居乃吾所售不必深悲當以還嫗即命取屋券對嫗焚之呼其子迎母還舊

居不索其直公遂還毘陵不復買宅借顧塘橋孫氏居  
暫住是歲七月坡竟沒於借居

秉燭周覽

郭從義鎮河陽於洛中造大第皆以香栢為之文梓為  
梁花石瓚地引水築山第成約費白金五千銖次年被  
召還都幕抵其第秉燭周覽時朝會有期侵晨而出行  
至東都卒家人不能居

乘車一遊

宋趙韓王普將營西宅遣人於秦隴市良材以萬數及宅成韓王時為西京畱守已病矣詔詣關將行乘小車一遊第中遂如京師竟至捐館不復再來矣又丞相陳升之治第潤州極為閎壯綿亘數百步宅成公已疾甚唯肩輿一登西樓而已人謂三不得居不得賣不得修不得

接楊收第

唐李建子訥居與宰相楊收第接收欲市訥舍以廣第



訥斥曰先人舊廬可為權貴優笑地耶卒不與

得晉公廬

見致仕

金盞玉杯

盧氏襟記唐僧泓師云長安永寧坊東南是金盞地安  
邑里西是玉杯地後永寧為王鏐宅安邑為馬燧宅後  
俱入官王宅賜袁弘及史憲誠等所謂金盞破而復成  
馬燧宅為鳳城園所謂玉杯破而不復完也

杏梁桂柱

白居易刺居處奢詩杏為梁桂為柱何人堂室李開府  
碧砌紅軒色未乾去年身沒今移主高其牆大其門誰  
家第宅盧將軍素泥朱板光未滅今歲官收別賜人開  
府之堂將軍宅未造成時頭已白逆旅重居逆旅中身  
是主人心是客更有愚夫念身後心雖甚長計非久窮  
奢極麗越規模付子傳孫令保守莫教門外過客聞撫  
掌迴頭笑殺君君不見馬家宅尚猶存宅門題作鳳城

園君不見魏家宅屬他人詔贖賜還五代孫儉存奢夫  
今在目安用高牆圍大屋

柱上生槐

孔帖孫儉堂柱生槐枝朞年而茂儉後秉政

梁上生芝

詩話宣和間賜王將明第既而有以梁生芝草為奏者  
車駕臨幸適久雨梅潤芝墜地京師無名子有為十七  
字詩曰相公賜新第梁上生芝草為甚脫下來膠少

岳飛宅

在杭州府治北郡人即其地立廟祀之廟有井相傳飛被害時有女尚幼挾銀瓶投井而死故廟併祀焉

趙抃宅

在衢州府城北孝弟里

高力士宅

宅在高州府茂名縣治西力士乃縣人馮盎之曾孫後為高延福養子故冒其姓

陸龜蒙宅

舊志龜蒙家在笠澤其故宅曰陸子幽居嘗著幽居賦  
無所增廣

唐李翹昆弟恃家勲貴各矜室廬唯翹所處乃父時故  
院無所增廣

常恐失墜

唐韓滉性節儉其堂先無挾廡弟洄增補之滉令撤去  
曰先君容焉吾等奉之常恐失墜安敢改作以傷儉德

又門當列戟以父時第門不忍壞故不請也後周王羅位開府大將軍安於貧素鄉里舊宅不改衡門

恐傷蟄蟲

宋曹彬所居之宅僅庇風雨敗簷疎牖不堪其憂而彬處之恬然堂屋敝壞子弟請加修葺公曰時方大冬牆壁瓦石之間百蟲所蟄不可傷其生

僅容旋馬

見丞相

蛙聚雀喧

唐吳融廢宅詩風飄碧瓦雨推垣却有鄰人為鎖門幾  
樹好花空白晝滿庭芳草易黃昏放魚池涸蛙爭聚栖  
燕梁空雀自喧不獨淒涼眼前事成陽一火便成原

園荒臺古

唐太宗過舊宅詩新豐停翠輦譙邑駐鳴笳園荒一徑斷臺古  
半階斜前池消舊水昔樹發今花一朝辭此地四海遂成家

樓

釋名牖戶諸射孔高明覲遠悽悽然也故謂之樓

儀鳳

晉宮闕名曰總章觀有儀鳳樓又揚州府城東有騎鶴樓

歸鴻

歸鴻樓在長沙瀏陽縣宋揚時建取目送歸鴻之義

仲宣

仲宣樓即荊州當陽縣城樓漢王粲避董卓之亂依荊州劉表因懷歸登樓作賦云登茲樓以四望兮聊暇日以消憂



# 焦度

武昌府治東南子城上有焦度樓南史宋明帝為武陵王時叅軍沈攸之起兵至夏口度于城樓上辱罵攸之怒攻其城度與力戰攸之與衆蒙楯將登度投以穢器敵不能冒城賴以全後呼此樓為焦度樓

# 百尺

洛陽地記洛陽城西北角有樓高百尺魏文帝造又南唐主宮中起百尺樓命羣臣視之蕭儼曰恨下無井唐主問

其故對曰所以不及景陽樓唐主怒貶儼舒州

五尋

晉孫楚吟樓賦有都城之百雉加層樓之五尋從明王以登遊聊暇日以娛心

候神

三輔黃圖公孫卿言仙人好樓居黃帝為五城十二樓以候神人武帝於是作飛廉觀

迎仙

唐高駢造迎仙等樓度高八十尺飾以金玉侍女衣羽衣  
新聲度曲以擬鈞天祈與仙接

鴛鴦

後魏溫子昇搗衣詩蝟蝟塞邊絕候雁鴛鴦樓上望天  
狼按天狼星名又唐詩花紅翡翠樓

鸛雀

鸛雀樓在蒲州城上李白詩云鸛雀樓前百尺牆烟汀  
雲樹兩茫茫漢家簫鼓浮流水魏國山河半夕陽事去

千年猶恨短愁來一日即知長風烟併在相思處滿目  
非春即自傷又張喬詩云高樓懷古動悲歌鶴雀今無  
野燕過樹隔五陵秋色早水連三晉夕陽多漁人遺火  
成寒燒牧笛吹風起夜波十載重來值搖落天涯歸計  
欲如何

勝賞

吳興白蘋洲北有白蘋亭唐貞元中建蓋一郡之勝賞  
也宋太守趙君旣新此亭復建樓於側名勝賞葉正則

為之記

遠景

樓在眉州北北塘上宋郡守黎錞建蘇軾有記

井幹

漢武帝建井幹樓高五十丈在建昌宮中積木而為樓若井幹之形也

鍾乳

樓在太原府忻州西北有阜屹然狀若鍾乳上建重樓

甚宜游眺

烽火

梁有烽火樓簡文帝登此樓有詩

鼓吹

梁陳殿庭之間各有鼓吹樓

觀稼

觀稼樓梁武帝建在應天府東

散花

散花樓在成都摩訶池上蜀王秀所建李白有登錦城  
散花樓詩日照錦城頭朝光散花樓金窗夾繡戶珠箔  
懸瓊鈎

穿針

應天府東北有穿針樓齊武帝建令宮中七夕登樓穿  
針故名

擊甌

保寧府巴縣東有擊甌樓唐張署有賦并序馮介詩座

上擊甌清似玉

賓日

山東登州府治後有賓日樓登州古岬夷之地取書賓  
賓日出之義以為名也

齊雲

五代唐韓建為鎮國匡國節度使昭宗幸其鎮登齊雲  
樓西北顧望京師作菩薩蠻三章以思歸其卒章曰野  
烟生碧樹陌上行人去安得有英雄迎歸大內中酒酣



與從臣悲歌泣下按鎮國匡國唐之軍名鎮國治華州  
匡國治同州昭宗乾寧三年李茂貞舉兵犯闕上從韓  
建議幸華州

真仙亦迷

隋煬帝開汴河泛艦為江都之遊浙人項昇進新宮圖  
帝愛之即如圖營建樓既成幸之曰使真仙遊此亦當  
自迷可目為迷樓

樵兒亦指

濟寧州南城上有李白酒樓白客任城時縣令賀知章  
觴之於此唐咸通中吳興沈光過任城嘗為作記齊魯  
結構凌雲者無限獨斯樓也高不踰數席瓦缺椽蠹雖  
樵兒牧豎過亦指之曰李白常醉于此矣元著作郎陳  
儼有重修李白樓記

昭明聚賢

文選樓在襄陽府治西梁昭明太子統所建聚賢士劉  
孝威庾肩吾徐昉江伯操孔敬通惠子悅徐陵王囿孔

樂鮑至等十餘人號高齋學士注文選於此

建封居妾

見寵妾

夕陽

夕陽樓在開封府滎陽縣唐時建李義山詩花明柳暗  
繞天愁上盡重城更上樓欲問歸鴻何處去不知身世  
自悠悠

春風

春風樓在南昌府城西宋况志寧詩晴日遊絲拂畫欄  
酒帘輕颺碧雲端春風蝴蝶知何處愁切江南曲已殘

八詠

金華府治西舊有元陽樓南齊太守沈約建有八詠詩  
宋郡守馮伉因此詩更名八詠樓李易詩千古風流八  
詠樓江山留與後人愁水通南國三千里氣壓江城十  
四州

萬卷

萬卷樓在保定府治內元首帥賈輔建以經傳子史百家衆流法書名畫別為九等置其上又邀致郝經築堂於樓側居之盡畀以書肆其觀覽嘗為之記

### 白雪

白雪樓在安陸州石城西下臨漢水取宋玉對楚襄王陽春白雪之義唐劉賓客詩江上樓高十二梯梯登遍與雲齊人從別浦經年去天向平蕪儘眼低寒色不堪長黯黯秋光無柰更淒淒闌干曲盡愁無盡水正東

流月正西

紫雲

唐主嘗詠杜甫曲江詞宮殿千門之語意天寶時環江  
有觀榭宮室即詔兩神策軍治曲江昆明作紫雲樓采  
霞亭詔公卿得列舍堤上

庾亮夜談

見水

米芾秋燕

無為州大安門上有稻孫樓宋米芾秋日登樓燕集見  
田口禾青可愛問諸老農農曰稻孫也稻已獲得雨復  
抽餘穗芾喜而名樓

### 望英

唐高宗命英國公李世勣伐高麗既破上於苑中樓上  
望之號望英樓

### 景蘇

景蘇樓在績溪縣舊秋風堂宋紹興間邑宰曹訓慕前

令蘇轍之賢摹其遺像及所為詩鐫於石建此樓貯之  
名曰景蘇又山東長山縣有懷范樓金時建謂思范仲  
淹也

繡楣雕拱

五鳳樓在河南府城後梁太祖即位羅紹威取魏良材  
為之宋梁周翰嘗作五鳳樓賦曰五鳳翹翼若鵬運風  
雙龍蟠首若鰲載宮繡楣焜耀雕拱玲瓏椒壁塗赭綺  
窗暈紅雙闕偶立突然如峯平見千里深映九重奔星墜



而交振靈景互而相逢五代于闐有七鳳樓

銅瓦排楹

西域泥婆羅宮建七重樓覆以銅瓦楹棟皆大排襍寶  
四隅置銅槽下有金龍口激水仰注槽中

祈祥

劉闢以太一舍於蜀乃造大樓以祈祥

避暑

唐莊宗患宮中暑濕不可居欲得高樓以避暑乃遣宮

苑使王允平營之郭崇韜曰願陛下無忘創業之難常  
如河上時則可使溽暑坐變清涼莊宗默然竟使允平  
建樓

宴勞將士

唐德宗建中二年發京西防秋兵萬二千戍關東上御  
望春樓宴勞之神策將士獨不飲上使詰之其將楊惠  
元對曰臣等發奉天軍帥張巨濟戒之曰此行大建功  
名凱旋之日相與為歡苟未捷勿飲酒故不敢奉詔及

行有司緣道設酒食獨惠元所部餅罌不發上深嘆之  
賜書獎勞

餞別士夫

蓮花樓在開封府城西廓門外宋時士大夫於此餞別

黃鶴

黃鶴樓在武昌府城西南隅黃鶴磯上世傳仙子安乘  
黃鶴過此唐崔顥有詩

白鵲

贛州八境臺北有白鵲樓蘇東坡詩白鵲樓前翠作堆  
縈雲嶺外若為開故人應在千山外不寄梅花遠信來

橫玉

成都府茂州治有橫玉樓

湧金

杭州府城西有湧金樓宋郡守徐鑄建

望湖

樓在杭州府城西北吳越錢忠懿王建蘇軾有詩

望省

唐崔日知歷職中外恨不居八座於吏部廳後起一樓  
與尚書省相望號望省樓又開封府西門有望京樓唐  
令狐綯有詩

韋蟾留謔

唐李湯題名於昭慶縣樓韋蟾留謔曰渭水秦川拂眼  
明希仁何事寡詩情只因學得虞姬壻書字纔能記姓  
名

弘正聚書

見藏書

召王共登

唐玄宗賜宗王成器等宅環於宮側又於宮西南置樓  
西曰花萼相輝每召諸王共登樓賦詩南曰勤政務本  
每歲千秋節酺飲於樓前

令奴更直

蜀周羣作小樓多令奴更直於上視天纔有一氣即白羣

野色天光

月波樓在嘉興府西北城上宋元祐中知州令狐挺建  
政和中毛滂重修自為之記鄭獬有詩野色更無山斷  
絕天光真與水相通張伯玉詩風光似逐水仙去物色  
都從雲漢歸

風帆沙鳥

黃州府治西北城上有竹樓宋郡守王禹偁元之建自  
作記云子城西北隅雉堞圯毀葺葺荒穢因作小樓二

間與月波樓通遠吞山光平挹江瀨夏宜急雨有瀑布  
聲久宜密雪有碎玉聲宜鼓琴琴調和暢宜詠詩詩韻  
清絕宜圍棋子聲丁丁然宜投壺矢聲錚錚然皆竹樓  
之所助也公退之暇披鶴氅衣戴華陽巾手執周易一  
卷焚香默坐消遣世慮江山之外第見風帆沙鳥烟雲  
竹樹而已待其酒力醒茶烟歇送夕陽迎素月亦謫居  
之勝槩也彼齊雲落星高則高矣井幹麗譙華則華矣  
止於貯妓女蒔歌舞非騷人之事吾所不取



心曠神怡

宋慶歷四年春滕宗諒子京謫守巴陵重修岳陽樓屬  
范文正公為記畧云春和景明波瀾不驚上下天光一  
碧萬頃沙鷗翔集錦鱗游泳岸芷汀蘭郁郁青青而或  
長烟一空皓月千里浮光耀金靜影沉璧漁歌互答此  
樂何極登斯樓也則有心曠神怡寵辱皆忘把酒臨風  
其喜洋洋者矣

雲奔浪捲

東坡聚遠樓詩無限青山散不收雲奔浪捲入簾鉤直  
將眼力為疆界何啻人間萬戶侯

來青

樓在松江府青龍江上元都水監任仁發建楊維禎有  
詩

迎翠

樓在太原府繁峙縣市中舊為真武閣元縣尹李德輝  
改今名



山堂肆考卷一百七十一

欽定四庫全書

山堂肆考卷一百七十二 明 彭大翼 撰

宮室

閣

說文樓重屋即閣也

巢鳳

帝王世紀黃帝時白鳳巢于阿閣

翔鸞

唐工部丹鳳門外中正殿曰含元殿夾殿二閣左曰翔  
鸞右曰飛鳳

圖功臣

見傳神

居貴嬪

見宮嬪

招靈

漢武帝起招靈閣有神女留玉釵與帝帝賜趙婕妤至

昭帝元鳳中宮人猶見此釵共謀欲碎之及視釵匣惟見白燕升天後宮人常作玉釵因名玉燕釵言其吉祥也又起招仙閣於甘泉宮西唐宋之間詩起草儀仙閣昇元

閣在應天府西南一名瓦棺梁時建高二百四十丈狄仁傑詩雲散便宜千里望日斜常占半城陰

蕭何藏籍

三輔黃圖石渠閣蕭何造下礮為渠以導水若今御溝

因以名閣藏入關時所得秦圖籍至成帝又于此藏秘書

揚雄校書

劉棻嘗從揚雄學作竒字王莽即位棻坐事誅辭連及雄時雄校書天祿閣上使者來欲收之雄恐不能自免乃從閣上自投幾死京師語曰惟寂惟寞自投于閣

王勃作序

滕王閣在江西南昌府城西章江門城外西臨大江唐



高祖子元嬰都督洪州暇日自選芳渚因為此閣閣成  
封為滕王因以名閣其閣夾以二亭一曰壓江二曰挹  
秀後都督閻伯嶼重修事見重陽後又有王緒王仲舒  
為序袁刺史韓愈為記

陳瓘讀書

潛山縣北有擢秀閣宋陳瓘嘗讀書于此後擢第黃庭  
堅因以名其閣自書其扁

四香

天寶遺事唐楊國忠用沉香為閣檀香為欄檻以麝香  
乳香為泥飾於閣壁謂之四香閣

三瑞

嘉定州邛縣西有三瑞閣宋寶元間建有蓮禾芝三瑞  
故也嘉祐間又有竝蒂蓮九穗禾雙犢牛三瑞因名

四照

四照閣在杭州孤山之顛宋鄭獬詩湖山天下之絕境  
群山繞湖千百重碧筍四插明鏡圓此閣正在明鏡中

雙清

閣在陝西汧陽縣東南四里玉清宮外高可遠望邑人於此觀競渡

降聖

唐天寶七年老君降于朝元閣因改為降聖閣

褒賢

宋樞密吳居厚被徽宗遇為建閣于私第以藏賜書又親書褒賢之閣四字以寵之

下臨肆區

河間王子晦第中起觀閣下臨肆區其人規晦曰庶人  
不及以禮然室家之私不願外窺今將辭公晦驚遽毀  
撤之

高瞰渭川

唐有重明閣在唐華清宮高瞰渭川下有蓮池

服慈

孔帖唐許景先神龍初東都造服慈閣景先獻賦

崇德

宗寶慶元年建昭勲崇德閣繪文武勲臣自趙普至葛邲二十三人像於其中理宗御書扁命鄭清之為記端平三年又增趙汝愚為二十四人

藏書

婺源縣學宮講堂之上有重屋焉榜曰藏書而未有以藏莆田林侯處知縣事始出其所寶大帝神筆石經若干卷以填之而又益廣市書凡千四百餘卷列庑其上

俾肄業者得以講讀而誦習焉名曰藏書閣朱元晦為之記

寶文

宋都汴時有天章龍圖寶文顯謨徽猷敷文諸閣皆置以藏諸帝御書者

絲綸

中書職掌綸誥因謂之絲綸閣

蓬萊

蓬萊閣在登州府城北丹崖山之頂宋郡守朱處約建  
至今為州人遊賞之所趙抃詩山顛危構此蓬萊水濶  
風長此快哉天地涵容百川入晨昏浮動兩潮來

松風

閣在武昌府西山寺舊有松林甚茂黃庭堅至黃州遊  
西山愛之因以名閣

蕙風

蕙風閣在紹興府治西宋史浩建與曲水閣相接有若

闕道當時西園之勝蕙風擅其半

含桃

閣在鳳陽府舊濠州廨宋祥符中梅詢為守呂夷簡為  
倅相得甚歡以此為憩宴之地

折桂

閣本名折桂在華亭縣尉廳宋右文殿修撰李夔為尉  
時生子綱于此後綱為相因呼為相公閣

臺



釋名臺者持也言其築土堅高能自勝持也

堯巡

王韶始興記含淮縣有堯山堯巡狩至此立行臺也按含淮縣即今韶州府英德縣始興即韶州古地名

夏享

左昭四年夏啟有釣臺之享按此臺在河南釣州陽翟縣南

栢寢

韓子曰齊景公與晏子游少海登栢寢之臺望其國曰  
美哉堂堂乎又漢武元鼎二年春起栢梁臺作承露盤  
高二十丈大七圍以銅為之上有仙人掌以承露

匏居

國語楚靈王為章華之臺與伍舉登焉曰臺美矣夫舉  
對曰先君莊王為匏居之臺高不見望國氛大不過容  
燕立人不廢時務官不易朝常今君為此臺人罷財盡  
數年而成諸侯莫至若君謂此美而楚其殆矣

晉靈彈人

左宣二年晉靈公不君厚斂以彫牆從臺上彈人而觀其避丸也臺在山西絳州西北二十里

平公妨農

左襄十七年宋皇國父為平公築臺妨于農收子罕請俟農工之畢

九層

劉向說苑晉靈公造九層臺三年不成人力困敝出令

敢諫者斬荀息曰臣不敢諫臣能累十二博棊加九雞卵于上公曰子試作之荀息乃正顏色定志意而作之左右懼息靈公氣息不續曰危哉危哉荀息曰不危復有危于此者公造臺三年不成男不耕女不織國用空虛社稷將亡亦甚危矣靈公即壞其臺

一柱

博物志江陵有臺甚大而惟有一柱衆梁皆拱此柱陸賈新語曰楚靈王作乾谿之臺高五百仞欲登浮雲窺

天文

見孟任

左莊三十二年公築臺臨黨氏見孟任從之闕而以夫人言許之割臂盟公生子般焉

寵西施

吳王夫差破越越乃進西施請退軍吳王許之吳王既得西施甚寵之為築姑蘇臺高三百丈遊宴其上伍子胥諫曰吾恐姑蘇臺不久為麋之遊吳王不聽按臺在

蘇州姑蘇山上就山起臺三年聚材五年乃成高見三  
百里下有百花洲宋楊萬里詩插天四塔雲中出隔水  
諸峯雪後新道是遠瞻三百里如何不見六千人

兩觀

兩觀臺在兗州曲阜縣魯城內孔子誅少正卯于兩觀  
之下即此

三歸

三歸臺在兗州東阿縣西世傳為管仲築

懷清

見喪夫

慕許

戴延之西征記許昌城本許由所居城東北七里有許由臺高六丈廣三十步邑人慕許由讓德而立

賣漿

賣漿臺在真定府棗強縣北相傳姜太公未達時嘗賣漿于此

醒酒

醒酒臺在懷慶修武縣東北百家岩前巨石是也乃晉  
劉伶醒酒處

望齊

史記趙武靈王為野臺以望齊中之境

朝漢

沈懷遠南越志熙安縣東南有岡高數十丈岡西南為  
羊腸道說者云尉佗登此望漢而朝宗曰望漢臺今廣



州府城北有越王臺即此望漢臺也宋楊廷秀詩榕樹  
梢頭訪古臺下看碧海一瓊杯越王歌舞春風地今日  
春風獨自來

子陵垂釣

釣臺在嚴州城東西二臺各高數百丈東漢嚴子陵垂  
釣處宋范仲淹詩漢包六合網英豪一箇冥鴻惜羽毛  
世祖功臣三十六雲臺爭似釣臺高

伯竒撫琴

撫琴臺在瀘州城北首尹吉甫子伯竒被後母譖于此  
臺撫琴作履霜操以自悲宓子賤琴臺在兗州單縣治  
北漢司馬相如琴臺在成都府華陽縣市橋西

鬪雞走狗

漢長樂宮中有鬪雞臺走狗臺

望鵠眺蟾

漢未央宮中有望鵠臺眺蟾臺

絃歌

絃歌臺在東昌府武成縣西一十里上有子游祠

### 金石

金石臺在江西撫州城西有名峯五第一峯獨高餘五峯差小名金石臺與第四峯聯屬後石洲水流其中故時有金石臺分丞相出之語宋晏殊王安石相繼拜相人以為應

### 青陵

青陵臺在封丘縣界宋康王欲奪其舍人韓憑之妻乃

築臺望之

絳帳

絳帳臺在荊州城西南漢馬融教授之所

通天

漢甘泉宮之地本黃帝以來祭天圜丘處漢武帝于此築臺其高上通于天故名

凝霞

杜陽編唐大中中日本國王子來朝云本國之東三萬

里有集真島島上有凝霞臺臺上有手譚池池中有玉  
棊子不由制度自然黑白分明

測影

測影臺在河南府登封縣東南古陽城縣內周公定此  
地為中土立土圭測日以驗四時

通靈

王褒雲陽記鈎弋夫人從上至甘泉而卒尸香聞十餘  
里葬雲陽武帝思之起通靈臺于甘泉宮有一青雀集

臺上時常往來至宣帝時乃不至

鑄鼎

岳州君山有軒轅臺一名鑄鼎臺黃帝鑄鼎荆山之下  
鼎成騎龍上昇唐胡曾詩五月扁舟過洞庭魚龍吹浪  
水雲腥軒轅黃帝今何在回首巴山蘆荻青

吹笙

吹笙臺在溫州府城南相傳周靈王子晉吹笙處

獲麟

獲麟臺在兗州鉅野縣東南即西狩獲麟之所後入于此築臺

判虎

判虎臺在鳳陽定遠縣治後相傳宋包拯為縣令虎傷人捕虎繫于臺前判之

曝書

曝書臺在兗州鄒縣治東南相傳子思曝書于此

吟詩

保定府易州大寧山有吟詩臺相傳五代時馮道吟詩于此

草玄

草玄臺在成都府治西南揚雄宅

翻經

翻經臺在九江府東林寺宋謝靈運翻經于此

延士

見求賢



圖臣

見傳神

銅雀

銅雀臺在臨漳縣治西魏太祖建又有金虎冰井臺三臺相去各六十里其上複道樓閣相通中央懸鑄大銅雀高一丈五尺置之樓頂臨終遺令施總帳于上朝晡時使宮中歌吹帳中望吾西陵西陵操墓處也

金牛

武進縣西有金牛臺劉宗元嘉末劉季之敗華欽于此  
與蕭順之共登此臺見枯骼橫道曰文王以來幾何年  
矣當復有掩之者乎

鳳女

鳳女臺在鳳翔寶雞縣東南即秦穆時蕭史事後人因  
其遺址建鳳女祠

鹿女

鹿女臺在秦州城內昔有王仙翁居山中見馴鹿產女

於草莽中挈養於菴鹿來乳之後十六載仙翁築臺居  
之

飼鴉

飼鴉臺在南陽三鴉路中大山側相傳漢光武北趨河  
朔至此失路得鴉引于馬前因飼之于此故名

呼鷹

呼鷹臺在襄陽城北漢劉表好鷹鳴嘗登此臺歌野鷹  
來曲宋蘇軾詩莫上呼鷹臺平生笑劉表

戲馬

戲馬臺在徐州城東南項羽嘗戲馬于此劉宗武帝在彭城九日曾登此臺

臥牛

臥牛臺在襄陽府棗陽縣漢光武嘗騎青牛于此

歌風

歌風臺在徐州沛縣東南泗水西岸漢高祖征英布還宴父老于此有大風之歌後人因以名臺又祭風臺在

武昌赤壁山下相傳漢昭烈與曹操戰祭風于此

望月

天寶遺事唐玄宗八月十五日夜與貴妃臨太液池凭欄望月不盡帝意遂敕左右於池之西岍別築臺百尺期與妃子來年望月

龍虎

龍虎臺在居庸關南臺廣二里袤三里與積粟山相峙有龍盤虎踞之狀故名元馬祖常詩龍虎臺高秋意多

翠華來日似鑿坡天將山海為城暫人倚雲霞作綺羅  
鳳凰

鳳凰臺故址在江寧縣治南鳳臺山劉宋元嘉中王觀  
見異鳥集此山時謂鳳凰遂築臺其上故名李白詩鳳  
凰臺上鳳凰遊鳳去臺空江自流吳宮花草迷幽徑晉  
代衣冠成古丘三山半落青天外二水中分白鷺洲總  
為浮雲能蔽日長安不見使人愁

雨花

雨花臺在金陵城南據岡阜最高處梁武帝時有雲光法師講經于此感天雨花

垂楊

垂楊臺在夔州府達縣治宋時所築臺下有鱗遊池叢石山脩竹園躑躅園

八風

王莽起八風臺以別四方之風蓋欲求神仙也臺成費萬金

九日

九日臺在應天城北世呼為松陵岡齊武帝九月九日  
宴羣臣于此

三休

賈子曰翟王使使之楚王欲誇之享于章華之臺三休  
乃至其上故又名三休臺按臺在荊州監利縣北相傳  
乃楚靈王所築監利古華容地唐胡曾詩茫茫衰草沒  
章華因笑靈王昔好奢臺土未乾簫管絕可憐身死野



人家

九成

見銘

章貢

章貢臺在贛州府治西宋郡守趙抃建據章貢二水之  
會憑高眺遠城北水光山色盡出乎几席履舄之間形  
勢與鬱孤臺對峙而甲乙稱雄蘇軾詩濤頭寂寞打城  
還章貢臺前暮靄寒倦客登臨無限意孤雲落日是長

安

琅琊

琅琊在青州琅琊山越勾踐徙琅琊起臺周七里以望  
東海秦始皇登此樂之留三月

落帽

落帽臺在荊州龍山晉孟嘉落帽處唐李羣玉詩落帽  
臺邊菊半黃行人惆悵對重陽

濯纓

濯纓臺在荊州監利縣北相傳楚屈原于此濯纓

凌歊

凌歊臺在太平府當塗縣黃山之顛劉宋孝武帝南遊  
登此臺建離宮唐許渾有詩

凌虛

凌虛臺在鳳翔府治東北宋陳希亮守郡時建從事蘇  
軾為作記詳見釋怨

亭

釋名亭停也道路所舍人所停集也後人創此以為  
暇日游宴登臨之所失古人之意矣

捉月

亭在采石山世傳李白過采石江酒狂水中捉月後人  
因以名亭

留雲

亭在潤州金山之絕頂平樂府仙官嶺有翔鳳亭宋鄒  
浩建以為避暑之所

干越

亭在餘干縣羊角山前瞰琵琶洲唐李德裕建施肩吾詩琵琶洲上行人絕干越亭中客思多按餘干縣今隸江西饒州本越之西境為越餘地故曰餘干

向吳

亭在鎮江府治西陸龜蒙詩秋來懶上向吳亭

鵠奔

亭在肇慶府城南按搜神記漢九江何敞為交州刺史

行部至高要宿于此亭夜有女子呼曰妾本廣信蘇氏  
女名娥嫁為同縣施氏妻夫死遺有襍繒偕婢驚之旁  
縣日暮宿于此亭俱為亭長龔壽刺死合埋樓下啟乃  
掘尸捕壽壽具伏罪初發尸時有雙鵠奔其亭故名

燕喜

亭在連州城中韓愈記云太原王弘中于其居之後荒  
丘之間立屋以避風雨寒暑既成愈請名之其丘曰竦  
德之丘石谷曰謙受之谷瀑曰振鷺之瀑土谷曰黃金

之谷瀑曰秩秩之瀑洞曰寒居之洞池曰君子之池泉之源曰天澤之泉合而名之以屋曰燕喜之亭取詩所謂魯侯燕喜者頌也

濯纓

亭在武康縣定光禪院小池上亭有唐人詩并碑刻

整冠

亭在韶州府帽子峰上取韓愈詩中上賓虞舜整冠裾之句故名宋守梁世安記左瞰瀘水右俯武溪萬山衮

袞悉聚目前

弄水

唐俞秀老紫芝題弄水亭臨江仙詞弄水亭前千萬景  
登臨不忍空迴水輕墨淡寫蓬萊莫教世眼容易洗塵  
埃收去雨昏都不見展時不似雲開先生高趣更多  
才人人盡道小杜卻重來

吸江

潤州焦山內有海雲堂贊善閣吸江亭



子雲亭

見銘

浩然亭

亭在襄陽府治南唐王維過郢州立孟刺史亭曰浩然亭并畫浩然像于其中後刺史鄭誠至謂賢者名不可斥改曰孟亭

蕪萑

漢光武至薊會王子接起兵薊中以應王郎城內擾亂

光武從駕而不敢入城邑舍食道傍至蕪葦亭時天寒烈馮異上豆粥

芙蓉

亭在永州府龍興寺中多水芙蓉故名柳宗元有詩

精思

見宰相

真賞

亭在湖州府安吉縣西方山之麓宋乾道間縣令安鼎

夢遊此山後因往上方寺循行而南經此與昔所夢無異遂建亭名真賞蘇東坡詩云自昔懷清賞神遊杳靄間如今不是夢真實是廬山

赤松

亭在岳州府華容縣南相傳漢赤松子遊此後人為作亭

白蘋

見洲

香霏

重慶府大足縣有地名曰海棠香國海棠無香惟此地  
產者有香故舊郡治前有香霏亭

墨妙

蘇軾記熙寧四年高郵孫莘老守吳興之明年作墨妙  
亭于府第之北逍遙堂之東取境內自漢以來古文遺  
刻以實之是歲十二月余以事至湖而莘老求文為記

夢草

亭在高郵州郡圃昔人有詩今日池塘見春草永嘉精  
魄獨依然

饅瓜

河南府城南下臨伊水有饅瓜亭宋呂蒙正微時讀書  
龍門見賣瓜者意欲得之無錢其人偶遺一枚于地蒙  
正取食之後作相建亭于此以饅瓜名示不忘貧賤也

解佩

亭在安陸州城北漢江邊即鄭交甫遇仙女解佩處又

漳州龍溪縣東有留佩亭宋通判鄭渙代去郡人攀留渙留佩為別後人即地建亭扁今名

玩珠

亭在高郵州樊良鎮宋嘉祐中揚州天長澤陂中有一大珠天晦冥時多現後轉入甓社湖或在新開湖凡十餘年鎮當珠往來之處行人往往維舟以待其現因名亭焉

夕陽

亭在河南府城南晉以賈充出鎮長安百僚餞送于此  
自旦及暮方畢因以名亭荀勗勸充結婚太子乃留充  
未行

秋風

亭在荊州巴東縣大江之左宋寇準建蘇轍有詩

思杜

亭在衡州城南華光寺唐杜甫墓耒陽宋郡守劉清之  
登華光山望之慨然有感遂築亭扁曰思杜

# 夢謝

晏殊類要謝靈運會稽人其家世不宜子息乃寄養于  
錢唐杜師明舍師明先夜夢有賢人相訪及曉乃靈運  
至後因以名亭白樂天詩夢兒亭古名傳謝歌妓樓新  
道姓蘇夢兒亭即夢謝亭也在靈隱寺山上

# 征虜

丹陽記大安中征虜將軍謝安立此亭因以征虜為名  
唐李白有夜下征虜亭詩船下廣陽去月明征虜亭山



花如繡頰紅火似流螢

醉翁

亭在滁州琅琊山醴泉之上宋慶厯中僧知僊為郡守  
歐陽修建修自號醉翁因以名亭遂作醉翁亭記

粲粲

道州治後有粲粲亭宋時建取杜甫春陵行粲粲元道  
州之意又有欣欣亭取白居易道州民歌老者幼者何  
欣欣之意有肅肅亭取杜甫餞裴道州肅肅秩初筵之

意有振振亭取柳子文廟碑振振薛公之意

勞勞

應天府治西南有勞勞亭吳時建李白詩天下傷心處  
勞勞送客亭春風知別苦不遣柳條青又有休休亭見  
致仕

疊翠

九江府城南有疊翠亭以對廬山九疊故名宋岳飛建

割青

亭在金陵青溪之上宋段約宅內因王安石有割我鍾山一半青之句故以名亭

繡谷

亭在盱眙縣舊崇福寺寺有四亭曰託根曰竹莊曰香雪曰杏村因其有梅竹茶蘼紅杏故楠其亭曰繡谷

綺川

亭在南寧府橫州治前宋楊志詩一泓綠靜滄浪水千朵紅酣菡萏花滿眼紛纒何所似江天日落散流霞

望嶽

衡州府治西有望嶽亭唐採訪使韋虛舟建以其東望  
清湘北瞻碧嶽因以名亭又崖州城南有望闕亭唐李  
德裕貶崖州司戶時建詩云獨上江亭望帝京鳥飛猶  
用半年程青山只恐人歸去百匝千迴重繞城

想山

亭在曹縣治北舊城宋郡守盧襄詩客來如見小牕扉  
便是山翁想山處

冷泉

亭在杭州飛來峰下唐刺史元稹建白居易記宋梅詢  
詩古竇鳴幽泉蒼崖結虛宇六月期客遊披襟苦徂暑  
開牕弄清淺吹鬢疑風雨不見白樂天煙蘿為誰語

清潁

潁州西湖上有清潁亭宋晏殊建蘇軾嘗與弟轍別于  
此有別淚滴清潁之句

過溪

杭州風篁嶺有過溪亭宋僧辨才退居龍井不復出入  
東坡訪之辨才送至嶺上左右驚曰遠公復過虎溪矣  
亭名過溪

臨臯

黃州城南有臨臯亭宋元豐三年蘇軾謫黃州寓居臨  
臯亭詩云臨臯亭中一危坐三越清明新改火後秦檜  
父官于黃生檜于亭中改名臨臯館

瓊花無雙

宋歐陽修于揚州城東蕃釐觀建無雙亭以瓊花天下無雙故也

荔枝連理

橫州江南岸有連理亭梁世基舊宅有連理荔枝一株  
宋神宗御賜詩橫浦江南岸梁家間世賢一株連理木  
五月荔枝天

富覽

亭在池州府銅陵縣治後宋縣令張孝章建詩云碧瓦

朱慶接翠崖周迴無地著纖埃山從雲脚斷邊出水向  
天根盡處來

洄酌

瓊州府城北雙泉之上有洄酌亭蘇軾有詩軾嘗于此  
鑿井得二泉相去咫尺而異味故曰雙泉後李光諫瓊  
居雙泉九年再移昌化有詩云曾是雙泉會主人

深樾

亭在海鹽縣治內旁依喬木下瞰清池宋李直養取韓



愈詩縣宰坐深樾之句因以名亭

窪樽

窪樽亭在湖州峴山有石樽可貯斗酒唐別駕李適之嘗飲于此後顏真卿及門生弟姪多携壺觴來遊作石樽宴集聯句元至元建亭其上

車蓋

亭在德安府西北取魏文帝西北有浮雲亭亭若車蓋之句又宋蔡確遊此亭詩紙屏石枕竹方牀手倦拋書

午夢長睡起莞然成獨笑數聲漁笛在滄浪

琵琶

見琵琶

思柳

亭在柳州府城東宋陶弼詩羅池刺史寡塵緣畫戟牆  
頭築望仙黃鶴與誰同一去碧桃無主又千年

景疏

新喻縣西十里有景疏亭宋歐陽國華致仕歸景慕二

疏而作此亭學士徐君平記

二水

亭在金陵城上與賞心亭相對宋史志正建取李白二水中分白鷺洲之句而名

半山

亭在金陵鍾山半道即宋王安石故宅

羅池

亭在柳州城亭宋郡守朱乾刻柳宗元像于中

峴山

襄陽府城南峴山上有峴山亭宋熙寧初史中輝重建  
歐陽修記峴山臨漢上望之隱然蓋諸山之小者而其  
名特著于荊州豈非以其人哉其人為誰羊叔子杜元  
凱是已

洗腳

李白洗腳亭送人詩白道向姑孰洪亭臨道傍前有昔  
時井下有五丈牀樵女洗素足行人歌金裝西望白鷺

洲蘆花似朝霜送君此時去回首淚成行

賞心

亭在金陵城上西南下臨秦淮盡觀覽之勝宋丁謂建  
嘗以真宗所賜袁安卧雪圖張于亭柱上有蘇軾題名  
曾拯詩云柱上題名客姓蘇江山清絕冠吳都六花飛  
舞憑欄處一本天生卧雪圖又滁州之西南泉水之涯  
歐陽公築亭曰醒心曾子固為之記

脩然

濠州有脩然亭取簡文帝遊華林園謂左右曰脩然臨水便有濠濮間想意

快哉

亭在黃州府城南宋郡人張夢得建可覽江山之勝蘇軾扁名快哉又作詞末句云一點浩然氣千里快哉風

五友

亭在四川南充縣宋游炳題明月清風為道友古典今文為義友孤雲野鶴為自在友怪石流水為娛樂友山

果橡栗為相保友是五友者無須臾不在此間也

兩者

新喻縣學西有兩者亭宋朱熹守長沙道經于此與謝  
諤會時人作亭表之

三會

亭在通州狼山上吳楚煙雲一覽周盡宋提刑薛球太  
守臧師顏通判吳天常皆故人會此因名

四見

亭在蘄州北塔後山顛宋范純仁建并命名蓋倣其父仲淹守鄱陽建四望亭之意

九思

宋文彥博留守大名建九思亭有詩紀之

十愛

亭在平樂府治西北宋郡守梅摯建因摯有十愛詩故以名亭其詩云我愛昭州月清宵入綺樓涼生荔枝浦冷浸桂江秋朱戶千家啓浮雲萬里收誰誇魏公子飛



上鄴城遊又有愛寺愛角愛水愛土愛觀愛路愛樂愛  
酒愛果共為十詩

陶侃得梭

化梭亭在臨江府東北清江鎮晉陶侃漁于雷澤得一  
織梭挂壁間一日雷電梭遂化龍去後人因作亭于陶  
母墓側

天祥祝石

吉安府永豐縣南有相石亭宋文天祥兵敗空坑過此

山時顧崖石祝曰天若祚宋願以崖石墮塞路言訖石果墮元兵不得進後人因名亭曰相石

天繪

夷堅志昭州瘴毒地而山水頗清婉郡圃有亭曰天繪郡守李丕以與金年號同欲更之有范姓者為易名清暉後李視積壤中有片石載丘濬所作記其畧云予擇勝得此亭名曰天繪取其景物自然也後某年某月日當有俗子易名清暉者可為一笑考其命名之月日果

不差

風雲

亭在長沙府嶽麓書院南宋劉珙建以為閒人遊息之所張栻記

萬象

福州府舊治有萬象亭宋葉夢得建富直柔詩云元戎小試經綸手萬象都歸指顧中

四香

亭在亳州治南宋安撫使趙雄題額永嘉何希琛曰茶  
麝香春芙蓉香夏木犀香秋梅香冬因名

喜雨

蘇軾判鳳翔建喜雨亭鑿池其南引流種樹為休息之  
所自為文記之

夢日

亭在蕪湖縣故王敦城上宋僧蘊湘建按晉明帝聞王  
敦將舉兵微行至湖陰察之敦晝夢日環其城驚起使

五騎追帝帝馳去見逆旅賣食媪以七寶鞭與之曰後  
有騎來以此示之媪如其言五騎傳玩稽留帝僅免後  
人因以夢日名亭又有玩鞭亭在蕪湖縣北宋楊萬里  
詩老賊平欺晉鼎輕一輪日色夢中驚寶鞭脫急非無  
策何似休將日繞營

六勸

亭在寧國府東南宋治平初縣令周景賢建作文勸民  
其條有六行孝弟務農桑向儒學興廉遜宗信行近醫

藥

十詠

亭在太平府城東李白有姑孰十詠詩謂詠姑孰溪丹陽湖謝公宅凌歊臺桓公井慈姥竹望夫山牛渚磯靈墟小大山門也後人因以名亭

放鶴

宋熙寧間雲龍山人張天驥作放鶴亭于徐州東山之麓蘇子瞻記彭城之山岡嶺四合隱如大環獨缺其西

而山人之亭適當其缺春夏之交草木際天秋冬雪月  
千里一色風雨晦冥之間俯仰百變山人有二鶴甚馴  
狎旦則望西山之缺而放焉縱其所如暮則傍東山而  
歸故亭以放鶴命名

狎鷗

亭在彰德府忘機堂前宋韓魏公建歐陽公題詩險夷  
一節如金石勲德俱高快古今豈止忘機鷗鳥信陶鈞  
萬物本無心魏公喜曰余在中書進退升黜未嘗置心

永叔可謂知我又永州城西有玩鷗亭宋汪藻字彥章號龍溪謫居時建其亭結茅所為向愚溪之口有羣鷗日馴其地因以名亭

一杯

亭在廣信府城南南臺之左宋趙汝愚為郡未踰年政成惠洽郡人于祥符寺傍建祠設像為之祝壽汝愚因觴客于中命撤其像戲名曰一杯亭取且盡生前一杯酒之義



萬石

亭在永州城北唐刺史崔能建柳宗元為記公以御史中丞來莅是州政暇登城見大石林立渙若奔雲錯若置棋于是闢壤剪榛立亭其中以其石多故名亭曰萬石

點易

亭在處州治南園宋紹興中司馬伋建唐明皇嘗贈葉法喜詩有滴露研硃點周易之句故云

法喜處州人

講文

兗州金鄉縣學有講文亭元至正四年建

過松

亭在岳州府城南相傳呂仙過岳陽日憩城南古松陰  
有人自木杪而下洞賓贈之詩惟有城南老樹精分明  
知道神仙過因名亭曰過松

折柳

亭在金陵城上賞心亭下宋張詠建為餞送之所

醉眠

亭在松江青龍江上宋僧行中建蘇軾命名

飛吟

世傳呂洞賓詣京師應舉遇鍾離翁于岳陽授以仙訣  
遂不復之京師今岳陽飛吟亭是其相遇處也

鱸鄉

亭在蘇州吳江縣宋熙寧中林肇建蓋取陳瓘秋風斜

日映鱸鄉之句

鵲吟

亭在濟南鵲山湖上宋曾鞏詩大亭孤起壓城巔屋角  
我我插紫烟灤水飛綃來野岸鵲山浮黛入晴天

壽樟

南康府建昌縣治南有壽樟亭宋項安世作記初邑人  
李左司公懋仕于朝高宗問樟公安否懋奏以枝葉婆  
娑四時常青何主上萬幾之暇眷眷乎遐方一樟哉必

閭閻纖悉轉而上聞抑念世家仁及此木也紹定間縣令陳文孫刻圖于石

靈根

建昌縣北又有壽松一名挂劍松其松盤屈竒怪宋寶慶初知縣曹幽創亭扁曰千歲靈根又于門外榜曰煙蘿勝景嘉定間縣丞李鴻漸刻圖于石

亭近顏廟

顏樂亭在曲阜縣顏子廟前舊有廢井宋膠西太守孔

周翰濟井及作亭扁曰顏樂司馬光有銘蘇軾有記程顥有詩

亭瞰史園

着州青神縣治後舊有亭下瞰史家園園多佳景宋黃庭堅嘗遊此扁曰借景因留詩云當官借景未傷民恰似鑿池取明月

山堂肆考卷一百七十二